

**Nzryr-krbz Pol Krali Mz  
Timoti  
Natq Ngr Nzaplxtqngr Mz  
Nzryr-krbz Pol Krali Mz  
Timoti**

Mc natq ngr nzaplxtqngr mz nzryr-krbz Pol ayrnrngr mz Timoti.

Pol yrle letz krali lc mz mzlir yiz 65—67 AD, mzli kc tqmncpx-ngr-mople mz presin mz nzwrde krali, tqaenzli-ngrde nznibq-krdr nide. Kztedeng amrlx nzrlaszpxlr nide, a' ngi txpwz Luk kc tzmncng badr. Yrle letz lc x sc tzbz ate.

Mz letz lc, Pol pibzle mz Timoti da kcng naokatrlr nide mz nzwztr-krbzle mz Gct. X rngidrlvz-ngrbzle bade mz nztu-amqngi-krde mz nzrlxngiti-krde x nzwz-krde kxmule-esz' da kx prtz. Rpi-kzpzle bade kx, “Sutitx-zlwzbz drtwrnge kx navz-kaipe' x mzli r nenq kzprla kc ate.” Murde krlzle kx ycpe pipz nzbz-krde.

<sup>1</sup> Nim la Timoti. Ninge Pol, aposol ne Mevalu Jiszs. X mcpX Gct ninge mz nzyapwxtipx-krnge nzlungr kxboi kc tqesalz-ngrbzle mz leplz kcng tzlXngitilr Mevalu Jiszs.

<sup>2</sup> Timoti, apubo bam trtem angidr. X krka'-ngrne kx Gct Trtegu x Kxetu rgu Mevalu Jiszs, nakabzlr bam zmrlz ngrdr kxmyalz, nzmnc-zpwXngr, x nayc mz drtwrdr nim. <sup>3</sup> Wztrpo mz Gct mz nabz kxtubq, da kc tzwai melrmqngeng.

X mzli kang kqlu krka'-ngrne nim, x awi-zvz-ngrbo bade. <sup>4</sup> Mz nzdctipxkr drtwrnge mzli kc tqprszpx-ngrne nim, tqyrni-ngrme bange, sutitx zlwz drtwrnge nzmc-krnge nim, murde na-abrtz-mouki.

*Natu-amqngi Mz Nzwztr-krbzme Mz Kxetu, Kxmule-esz' Drtqm Nzaetqbz*

<sup>5</sup> Krlz-angidrx kx lxngiti-zpwxq Kxetu rgu. Murde blrkqm Lois x lxem Yunis, nzalvztr-ngrdr nim, mz nzlxngiti-krm Jiszs Kxnmcpx. X krlz-kzx kx nzrlxngiti-krm sc tqxplrpe krlzmle mzli ka. <sup>6</sup> A' mzli ka nadcpx mz drtwrm mzli kc tqyrlqo-ngrbo mqnge bam, x Gct avzomle bam zmatq ngr Mqngrkxtr mz nzwztr-krbzme bade. X drtwrm napqtr zvz mz nzwz-nqblq-krm zmatq lc. <sup>7</sup> Murde Mqngrkxtr ngi nou zmatq, nivz, x nzaclve-lzbqngr. A' trbatrpwzleu zmwxlr. <sup>8</sup> Delc, bzkq mwxlrq nzpipx-krbzme Kxetu rgu mz leplz, x bzkq myangr drtqm nzmncpx-krmc mz presin mz nzwztr-krbo bade. A' narlrpx-lzbq-ngrn mz nzyapwxtipx-krm Nrpakxmrlz mz zmatq ngr Mqngrkxtr, kxmule-esz' drtqm nzaetqbz da kc tqwaix.

<sup>9-10</sup> X Nrpakxmrlz lc nide sele.

Gct arlapxle x kqlele nigu nzngini-krgru doa kxnztr nedeng, mz nzvz-nqblq-krde me pnz drtwrde x zmrlz ngrde kxmyalz. A' trvzpxpuu mz da kx aleku. Murde mzli kc nrlc trnzwzka-ngrde, Gct pnzpe drtwrde kx Mevalu Jiszs Kxnmcpx na-arlapxle nigu. X mz nzvzo-krmle mz nrlc, aovxiole zmatq

ngr nzbzngr. X Nrpakxmrlz aelwapx-ngrde kxnamu nziprtrngr mz nzlungr kxboi.

<sup>11</sup> X nzmcpix ninge mz nzngini-krnge aposol mz nzalvztrngr x nzrlepixngr Nrpakxmrlz. <sup>12</sup> X mzli ka, mz nzwztr-krnge lc mz Nrpakxmrlz, dekc tqaetqmle drtqnge x tqmncpx-ngrmc mz presin. A' trmya-ngru drtqnge. Murde krlzx Gct kc tqabrkitrx drtwrnge. X lxngitix kx sa nabatrphe Nrpakxmrlz kc tqaprcmle bange nzryapwxtipx-zvzngi nakrlzbxle nzyzlu-krm Jiszs. \*

<sup>13</sup> Timoti, nadcpix mz drtwrm nzalvztrngr kxtubq kcng tqpibo bam. X alvztr-zpwxbz mz leplz. X mz nzaxvctr-krbzme mz Mevalu Jiszs, navz zvz nzabrtr-krbzme drtwrm bade x nzmrlzti-krm nide. <sup>14</sup> X mz nzokatrkr Mqngkxtr kc tqmncpxm bagu, aclve angidr Nrpakxmrlz kc tzaprcbz bam. Murde nzalvztr-ngrng amrlx mz Nrpakxmrlz lc natubqpwx mz nzyapwxtipx-krmleng.

<sup>15</sup> Krlzpeq kx kxnzrlxngiting nzklung dalr Provins kc Esia, trnztu-amqngiung mz nzokatrkrdr ninge, a' mzli ka nzrlaszpelr ninge. X wai-kzle Fijelzs x Hzmcjinis.

<sup>16-18</sup> A' abrtz-zlwz-ngrne Onesiforzs. Krlzpeq kxmu nzokatr-krde ninge mztea Efszs. X mzli kc tqkaputr-ngrmle Rom, rtangrtile ninge, vz vz mzli kx rmcti-ngrde ninge. X trmya-ngru drtqde nzmncpx-krmc mz presin. A' okatr-zvzle ninge. X delc, mz nzkrka'-krnge, tqrlxti-ngrbo mz Kxetu

---

\* **1:12** Kzdung leplz nztekqtr-krdr ngalrde lc blepxbz, mz nzipi-krdr kx, "X lxngitix kx sa na-aclve-angidrle nzlu-krnge, nakrlzbxle mzli kc nabz-ngrne o nzyzlu-krm Jiszs." Kzdung natq mz Grik tropxu.

rgu kx na-amrlzle lr ma nyzde mzli ka. X krka'-ngrne kx Kxetu rgu nayc mz drtwrde nide mzli kc nayzlu-ngrm Jiszs.

## 2

<sup>1</sup> Mrlxnge Timoti, nzrlxngiti-krm naxplr mz nzokatrkr Mevalu Jiszs nim. <sup>2</sup> Xlr-zvzme nzalvztr-krnge mz Nrpakxmrlz. Mzli ka, aprcbz nzalvztrngr lcng mz leplz kcng tqabrtrpzku drtwrgu badr mz nzalvztr-krdr kzdung kz leplz, murde leplz lcng na-alvztr-moulr kzdung kz leplz. <sup>3</sup> Rlrpx-lzbqngr, da kc tqwaix, mz nzwztr-krbzki mz Mevalu Jiszs, kxmule-esz' drtqgi nza-etqbz. <sup>4</sup> Na-apuki ncblo ngr vea, kc tqvz-nqblqpzwle kxetu rde. X tr-rlr-ngrpwzleu nza-otrkr ncte dalr nrlc. X dekc tqabrtzlvzngr kxetu rde nide. <sup>5</sup> X na-apu-kzki doa kx prtr mz nzesangr. Murde vz-nqblqpzwle nqm q ngr nzesangr, murde natwzle da kxmrlz. <sup>6</sup> X na-apu-kzki doa kxwz kato mz nrlanc. Murde sa nangq-kaile dalr nrlanc kc tqetqti drtqde. <sup>7</sup> Na-aoti vzv drtwrm nzymne-ebzpxngr lcng tq, murde Kxetu rgu na-aopxbzle bam kxnamu nzwztr-krbzme bade.

<sup>8</sup> Delc, nayc-zvz-ngrde mz drtwrm Nrpakxmrlz lc tqyapwxtipxx mz nzwztr-krbo bade, kxmule-esz' nzaetqbz drtqm. Murde Jiszs Kxnmcpk kc tqvzpxm mz nqvi lr King Devet, drtqde nzaetq-kaipz mz nznribqngr nide, a' tulz-mop mz nzbzngr. <sup>9</sup> X drtqnge nzaetq-kzpz mz nzamyati-ngrm drtqnge x nzamncpx-krmlr ninge mz presin. X nzapusr-ngrdr ninge ncblo kx xpqbrl-rngr lou murde lepax Nrpakxmrlz. A' natq Gct

rbxl nzapqbrlvzngr mz presin. <sup>10</sup> Delc, tqvz-zvzngr nzlepx-krnge Nrpakxmrlz, x rlrpx-lzbq-ngrne mz nzprtilz-krdr ninge da lcng amrlx, murde leplz kcng tqmcpx Gct narlapx-kzng, mz nzlxngiti-krdr Mevalu Jiszs, x naprtr-kzng mz nzlungr kxboi Heven. <sup>11-13</sup> Murde natq angidr deseleng.

Mz nzbzmi-krgr Kraes, sa nalu-aloku badr.

Mz nztu-amqngi-krgr mz nzrlxngitingr, sa na-acleku badr mz nrlc kc navzm.

A' nekeng nzpxtpx-ngrdr nide, sa napxtpx-kz-ngrde nidr.

Kxmule-esz' taoku mz nzatutr-krgr da kx esalz-ngrbzku bade, a' trtxpnzngr nztao-krde mz nzatutr-krde da kx esalz-ngrmle bagu.

Murde nqm q kr Kraes trpnzngr nztekqtr-krde, a' vz-nqblq-zvzle nqm q krde lc tqmrlz.

### *Kxanzawz Angidr Ne Gct*

<sup>14</sup> Timoti, adcpx-mopwz mz leplz nemqng natq kcmang tqpi-kaipo. X mz drtq Gct, rpwa'-ngrbz badr nzotablrlvz-krdr natq kx akipxle leplz. Murde trokatrleu leplz, a' atrkatile kxnlzaltqng.

<sup>15</sup> Navz zvz nzalvztr-zpwx-krm Nrpa ngr Jiszs, murde nakrlzq kx Gct abrtzlvzle nzalvztr-krmq lcng x drtqm trmyau mz nzmc-krdeleng. <sup>16</sup> A' kapx-lzbqm mz leplz kcng tzymnetr-ngrdr dalr nrlc. Murde drtwr kxmule lc tramatqleu Gct x trokatrleu leplz. A' mailztxpxle nidr mz nzrtxlvlz-zvz-krdr alwx ngrdr. <sup>17</sup> X nzalvztr-krdr lcng tqtrka sa naetunepx mz mzlirmu. X na-apule kxsqki kc tqngi kansz. Kzdq kxnzalvztr-rbr lcng drtqde Haemznezs x kzdq kz drtqde

Filetzs. <sup>18</sup> Nzvz-rlrubzng mz nzalvztrngr angidr. Murde nzrpilr kx nigu kxnzrlxngiting sc tzat-  
ulzpeng mz nzbzng x trpe-moungr nztulzkr  
nrkrdrtqgu kalr. Nzalvztrngr lc tqatrkatipezle  
nzrlxngitigr kzdung leplz. ✧ <sup>19</sup> A' krlzku kx  
nzalvztrngr angidrng kc tqkabz Gct sa natu-  
amqngi-alo. Murde Nzryrngrkxtr rpilr kx, “*Yawe  
krlz-angidrle nekeng leplz nedeng.*” ✧ X rpi-  
kzle kx, “*Leplz amrlx kcng tzplzpxlr kx nzlxngitilr  
Kxetu naesablqtilr nqm q krdr kxtrka.*” ✧

<sup>20</sup> Mz nzvz-nqblq-krde nqm q krgu, mzli kx  
vz-ngrm kzdq kxetu mz ma nyzgu, rkabzku  
bade dakxnzng kxmrlzti, mz nzamatq-krdu  
nide. A' mzli kx mnc-ngrgu esz'-krdu, trmu-  
zvzkuu dakxnzng kxnamulr krkcng tzkabz bade.  
<sup>21</sup> X krlc nzymne-ebzpxngr kx navz-nqblqku.  
Nzmu alqngi-lzbqku mz da kcng tqtrka, apuku  
dakxnzng kcng tqmrlz. X takitnde nzmcp x nigu  
mz nzokatr-krdu Kxetu rgu, murde tqolique-  
ngrgu mz nzale-zvz-krdu da kxmrlzti. <sup>22</sup> Mz  
nzmu-krde lcde, kx Timoti, esablqti da kxtrka  
amrlx kcng tzmrlzbx mz obla. A' mz nzokatrkr  
leplz kcng tzlxngitilr Kxetu rgu x tzsuti drtwrdr  
nzabrtzlvz-krde nidr, navz zvz nzale-krm da  
kxtubq, nztu-amqngi-krm mz nzrlxngiti-krdu,  
nzmrlzti-krm Gct x leplz, x nzmnc-zpwx-kz-krmu  
badr. <sup>23</sup> Eu, navz zvz mz nzpxtpx-krm nza-  
ongr drtwr kcng tqangqngu-ngrde leplz, murde  
nzbatrpzlr nzotablgr. <sup>24</sup> Murde kxnzawz ne  
Kxetu, bzkq nzotablgrng x drtwrde ngya ani mz

---

✧ **2:18** 1 Korint 15 ✧ **2:19** Nzkqlu-krdr 16:5; Jon 10:14 ✧ **2:19**  
Joel 2:32; Sam 34:12-14; Nzryrplaxngr 3:7

nzatrkatikr leplz nide. A' nanginide mrlx kx okatrlle leplz amrlx x alvztr angidr. <sup>25</sup> X mz nivz lr Kxetu, na-atubqtile leplz kcng tzpxtxpx-ngrdr nide, murde mwx elx Gct naokatrlle nidr mz nztekqtr-krdr nqm q nr drtwrdr x nalxngitilr natq angidr. <sup>26</sup> X drtwrdr naopx, murde narlapxbzng mz nzesabrtikr Setzn, kc tqrtulrtr-ngrbzle badr nzale-krdr me pnz drtwrde.

### 3

#### *Leplz Kxnztrkang Mzli Ka Tqaenzli-ngrgu Nyzylu-krm Jiszs*

<sup>1</sup> Nakrlzq kx mzli ka tqaenzli-ngrgu nyzylu-krm Jiszs sa naprtr-kzku mz nzkxpungr kang kqlu. <sup>2</sup> Murde kxmule-esz' nzrpilr kx nzlxngitilr Jiszs, a' leplz nzklung sa navz-rbrng. Sa na-aoti txpwz drtwrdr nidr esz'-krdr, x namrlzbz badr trau. Sa naglqpx-lzbqng x nalcpung. Sa narpibqting leplz x narnzlvzolzr natq trtedr x lxedr. Trna-abrtzlvzlru da kxmrlz x trna-amatq-kzlru Gct. <sup>3</sup> Trpnzngr scdr nivz x trnakrlzlr nzipqngr leplz. Trna-aclvetio-lzbqung x sa narpikiti-katong leplz. Trpnzngr nzrycngr mz drtwr badr, x sa natrka badr da kxmrlz amrlx. <sup>4</sup> Trpnzngr nardr x sa na-amwalr kzt-edrng. Sa namrlzbz badr alwx ngr nrkrdrtdr namyaszpxle nzvz-nqblq-krdr Gct. <sup>5</sup> Leplz lcngr sa naprtrpqng bagu mz nzrpi-krdr kx nidr lrmakxtr. A' trtingr, murde trnzrlrpx-lzbq-ngrpwzung mz zmatq ngr Mqngrkxtr, nztekqtr-krde nabzdr. Delc nayrlqpx-lzbq-ngrbzku badr.

6-7 Kzdung leplz kxnmulr lcng nzprtrpzng mz ma nyz olvz kcng nzrlxngiti-krdr trxpplru, mz nzesabrti-krdr leng mz nzalvztr-rbr-krdr. X olvz lcng nzvz-nqblq-tpwzlr drtwrdr esz'-krdr. X o ani tpxwz nzrtwz-krdr nrpa kznike vzne, murde nzrpilr narmcti-ngrdr nrwx. A' rblx nzkriz-krdr da angidr murde suti drtwrdr alwx ngrdr namyaszpxle nzvz-nqblq-krdr Gct, kc tqngi nou nrwx. <sup>8-9</sup> Ncblo kcng tzvznebnzng mz ma lcng, nzpibqtilr Nrpakxmrlz. Murde nzaokrdr drtwrdr kxdrka'-ngrng, x nzvz-rbrng mz nzrlxngiti-krdr. Ncblo lcng nzapulr Janzs x Jabrzs kcng bqnc, tzpibqtilr nzalvztrkr Mosis. A' nzpokia-krdr aelwapx-lzbqpengr. X mz nqmqlcpwz, ncblo kcng tzvzneng mzli ka, nzvz-rbr-krdr sa naopx kalr. \*

### *Vz-nqblqpwx Nzalvztrngr Angidr*

<sup>10</sup> Timoti, vz-nqblqpeq nzalvztr-krnge, nqmqlkrnge, me pnz drtwrnge, nzrlxngiti-krnge, trznngya-ani-kru drtwrnge, nivz lrnge, x nztu-amqngi-krnge. <sup>11</sup> X krlzpeq kxmu nzatrkatikrdr ninge, x nzaetq-krdr drtqngc mzli kc tqmnc-ngrne mztea Adiok, Ikonizm, x Listra. ✧ Kxmule-esz' sc tzatrkatilr ninge, a' Kxetu rgu sc tqokatrpele ninge x arlapxle ninge murde ma tqbzx. <sup>12</sup> Murde da zpwxtx kx leplz amrlx kcng tzsuti drtwrdr nzvz-nqblq-krdr me pnz drtwr

---

\* **3:8-9** Mzle-lzbq lcng, Janzs x Jabrzs, drtqdr trnzryoung mz Nzryrngrkxtr. A' mz nqmqlkr lr Jiu, nzrpilr kx ncblo lcng nidr ncblo neng King r Ijpt kxnzrngineng dabo ngr nzaelwapx-krdr rlx kx vzpxm mz drka'. [Nzrlaszng 7:11-22; 8:7-19] ✧ **3:11** Aposol 13:50; 14:4-6, 19-20



Gct mz nzlXngiti-krdr Mevalu Jiszs, sa na-atrkati kz leplz nidr. <sup>13</sup> A' leplz kxdrka'-ngrng badr kxnpokia-ngrdr kxnzlxngitilr Jiszs, nztrka-krdr sa naetunepx zvz. X sa naesabrtilr leplz murde nzesabrti-kaing.

<sup>14</sup> Timoti, krlzq kx nzalvztr-krgr ngi da angidr, murde krlz-zpwxq nigr kcng tzalvztrlr nim. Delc, navz zvz mz nzlXngiti-krmlc. <sup>15</sup> Abzo mzli kc tqtopwzbe-ngrn, krlz-zpwxq Nzryrngrkxtr. X zmatq ngrde alvztrpele nim kx nabrti drtwrm Mevalu Jiszs mz nzarlapx-krde nim. <sup>16</sup> Gct kaomle natq amrlx mz Nzryrngrkxtr mz zmatq ngr Mqngrkxtr, murde natq lcng naokatrle leplz mz nzalvztr-krdr nidr, mz nzlc-apqzbz-krdr nidr, mz nzatubqti-krdr nidr, x mz nzaelwapx-krbzlr badr nzmncngr kxtubqzbz mz nzobqkr Gct. <sup>17</sup> Murde doa nedeng, naoliqting mz nzale-krbzlr da kxmrlz mz leplz.

## 4

### *Nzwz-krm Navz Zvz*

<sup>1-2</sup> Timoti, mz nzwz-krm, naoliq-zvzq mz nzyapwxtipx-krm Nrpakxmrlz, kxmule-esz' mrlzbz bam o mrlzbz mz leplz o trtingr. Nzalvztr-krm naokatrle leplz mz nzaopx-krde da kx vz-rbr, x mz nzatubqti-krde nidr x mz nzapqtr-krbzle drtwrdr. X aenzli-zpwxzbz badr mz nzvz-nqblq-krdr natqm. Murde Mevalu Jiszs x Gct Trte sa tzobqlvz-ngrdr nzwz-krm. X mzli kc Mevalu Jiszs navz-ngrmlc mz nzngini-krde King r nrlc, sa napipxbzle mz leplz amrlx nztubq-krdr o trtingr, kxmule-esz' kxnzclubeng o kxnzbzpeng.

<sup>3</sup> Murde kalr, leplz trnavz-nqblqlru nza-lvztrngr angidrng. A' sa navz-nqblq-tpwzlr me pnz drtwrdr x nalalztq-lzbzng mz kxnzalvztrng kcng drtwrdr tqesz'ti badr. <sup>4</sup> X sa naesablqtilr da angidr mz nzo-lxlvrti-krdr be ngr nqm q krdr kcng trngiu da angidr x da kx trpnzngr drtwr ngrde. <sup>5</sup> A' nim, kx Timoti, namnc-nrwx-ngrn mz da amrlx. Kxmule-esz' nzaetqbz drtqm, a' navz zvz mz nzale-krm nzwzngr kcng tqaprcbo bam. Ryapwpxpbz Nrpakxmrlz mz leplz kcng trnzlxngitikalr Jiszs, mz nzrlrpx-lzbq-krbzme mz Kxetu rgu, da kc tqwaix.

<sup>6-7</sup> Murde rlrpx-lzbqpe-ngrbo mz Gct, kxmule-esz' ycpe pipz nznibq-krdr ninge. X angidatipex nzwzngr kc tqaprcmle bange mz nzngini-krnge ncblo ngr vea kxmrlz ne Kraes. Murde ota-zpwxpex mz nztu-amqngi-krnge mz nzrlxngit-ingr. X vo-angidr-kzx mz nzesangr kc tqyrlqmle bange x sc tqayrkrpxpex. ✧ <sup>8</sup> X krlzx kx sa natwzx da kxmrlzting Heven kx nzvzpxmqng mz nzabrtzlvzkr Gct nzmnc-krnge mz nrlc ka. Murde Kxetu rgu tubq zvz mz nzayzlu-krbzle da mz leplz. X mzli kc nayzlu-ngrmle, sa nakamle bange da lcng tqmrlzting. X leplz amrlx kcng tzaenzli-kzlr nzyzlu-krmle x tqabrtzlvz-kzle nidr, sa natwz-kzlr da lcng tqmrlzting.

### *Natq Ngr Nzarlz-lzbqngr*

<sup>9</sup> Sutitz zlwz drtwrnge nzvz-ani-krme Rom mz nzmnc-lxblr-krgi. <sup>10</sup> Murde Demas mrlz zlwz bade dalr nrlc. X rlaszpele ninge x vzpe taon kc Tesalonika. Kresen vzpe mz nzwz-krde mz

---

✧ **4:6-7** 2 Timoti 2:4-5

Galesia Provins, x Taetus vzpe kz mz Dalamasia Provins. <sup>11-12</sup> Atwzlrpe-ngrbo Tikikzs bam mz nzteqtr-alzu-krde nim mz taon kc Efisz. A' Luk kx mnc-tpwzkr ncd r mzli ka. Oti Jon Mak x vzmamu ncd r, murde krlzle nzokatr-krde ninge mz nzwzng r mrka. <sup>13</sup> Mzli kc navz-ngrme, twzm du dztungeng. Twzm kot scnge, ycbz mz mzlegi Kapzs mrkc mztea Troas. X twz-kzp buk scngeng, myapxbz krkcng tzwzng r mz be kzu.

<sup>14-15</sup> Nzmu kx tqrmctiq Aleksada kc tqrwzng r aian, aclvetio nide. Murde rpwa'-ngrde nzalvztr-krgu, x yctxbz nzatrkatikrde ninge. A' krlz-angidrx kx Gct sa na-ayrplapxle nide.

<sup>16</sup> Mzli kc tqkot-ayrnr-ngrne mrka Rom, trpnzng r kztegun g kx okatrle ninge. Murde nzrlasz-ngrdr ninge mz nzmwxlr-krdr. A' krka'-ngrne kx Kxetu rgu naipqle nid r. <sup>17</sup> Murde Kxetu tpxwz kx tum mz nibrnge x abrmle nelzng e. Delc tqyapwxtipx-zpwx-ngrbo Nrpakxmrlz mz leplz amrlx kcng trngiulr'jiu tzmncng mz kot. X Gct arlapxle ninge murde trznibqkalr ninge. <sup>18</sup> X krlzx kx Kxetu sa na-arlapxbzle ninge mz da kxtrka amrlx. X sa na-aprtrle ninge mrnyzde Heven.

X naglqpx zvv nide. Eu, angida.

<sup>19-21</sup> Eu, sutitx-zlwzbz drtwrnge kx navz-kaipe' x mzli r nenq kzprla kc ate. Murde Erastzs sc tqmnc taon kc Korint x Trofimzs sc tqamncxtne mrkc mztea Miletzs, murde yagox.

Timoti, rpibz "Nimu la," mz Prisila ncd r Akwila, x lr ma nyz Onesiforz. Doa lrmakxtr amrlx mrka, myapxbz Yubulzs, Prudens, Linzs, x Klaodia, nzrpibzlr bam kx, "Nim la."

<sup>22</sup> Krka'-ngrne kx Kxetu rgu namnc zvz mz nabzm. X naokatrle nimu amrlx mz zmrlz ngrde kxmyalz. Eu, angida.

Delape. Ninge *Pol.*

**Nzryrngrkxtr Kc Ate Rut x Sam**  
**The New Testament plus Ruth and Psalms is the**  
**Natügu language of the Solomon Islands**  
**Buk Baibel long langguis Natqgu**

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

---

PDF generated using Haiola and XeLaTeX on 21 Feb 2024 from source files dated 31 Aug 2023

fb2b7f06-e254-5fb7-b59d-ee21d5d7a93f